



hr1: hr1-Zuspruch

19.04.2017

montags bis freitags ca. 5.45 Uhr, samstags 7 Uhr

Pfarrer Helwig Wegner-Nord
Frankfurt/M.

Mein Bekande, de Kall, en Hahn un en Schwan

Mein Bekande, de Kall, fraacht misch als ema, warum was so un net annersder is. Jetzt zum Beispiel. Da issem ufgefalle, dass uf mansche Kerschturm zwar en Kreuz is. Des is ja aach net verwunnerlich, maant de Kall. Des Kreuz is ja des Symbol fers Christentum. Aber uf viele annere, da hockt en Hahn.

„Waaßte“, sacht isch, „de Hahn is ja en Voochel, wo mojns in de Früh kräht. Also wie son Wecker den neue Taach ankündischt.“

„Isch waaß“, sacht mein Bekande, „des musste mer werklisch net verzähle.“

„Ja aber darum“, erklär isch meim Bekande, „weil mer, wann de Hahn kräht, merkt, dess die Nacht vorbei is, is der Hahn zum Symbol fern Herr Jesus worn. Der steht ja aach fer des neue Lebe nach der Dunkelheit. Sozusaache.“

„Aber waaßte was?“, macht de Kall hartnäckisch weider. „Als isch letzt Jahr obbe an der Nordsee war, da hab isch in Ostfriesland statt em Hahn uffem Kerschturm da obbe en Schwan gesehe. Un net nur einma. Hallo? En Schwan? Isch hab mer die Aache geriebe, weil isch gedacht hab, isch hätt misch verguckt. Soll des e größer Ausgab vom Heilische Geist sein, oder was?“

„Naa“, erklär isch ihm. „En Schwan is des Tier, wo mer mit dem Martin Luther in Verbindung bringt.“

Der Grund defür is e bissi kompliziert. Aber pass uff. Rund hundert Jahr vor Luther hat in Böhmen en annere Reformator namens Johannes Hus gelebt. Un waaßte, was des tschechische Wort Hus uf deutsch haaßt?“

„Schwan?“ meint de Kall. „Naal“, saach isch. „Net Schwan sonnern: Gans. Aber weider: 1415 is der Hus dann wesche seine Ansischte – wie mer das damals gern gemacht hat – verbrannt worn. Un vor seim Tod soll er – angeblich – uf die Bedeutung von seim Name aagespielt ham un gesacht ham: ‚Jetzt brate se e Gans, aber in hundert Jahrn, da werd en Schwan singe!‘

Verstehste? Den Satz hat der Martin Luther uf sisich bezooche. Der Hus war die Gans un er is der Schwan, den der hundert Jahr vorher schon prophezeit hat. Un darum sitzt bei mansche Kersche uffem Turm kaan Hahn, sonnern en Schwan!“

„Mein lieber Schwan!“ sacht da mein Bekande, de Kall. „Da war der Luther aber ziemlich mutisch, sisich in ei Reihe mit som Mann zu stelle, wo mer umgebracht hat!“

„Ja“ sacht isch. „Un isch denk, dess die Leut grad deswesche en Schwan uf ihr Kerschturm gesetzt ham. So mutisch wie ihne ihr Reformator wollde se aach selber sein. Un wer waaß, vielleicht gehn die Kerschgänger ja e bissi mutischer aus der Kersch raus, als se enei gange



sin!“